

oder muthwilliglich verschuttet / also daß solche Leuth schier biß vber die Knöchel in dem Wein tramppen.

Was soll man viel sagen? Es ist leider bekand genug / daß aber sage ich / vnd glaube festiglich / daß Gott (ehe mans meinen möchte) leichtlich solchen vnChristlichen wesen (wie bey Loths vnd Nohe zeiten / da sie assen vnd truncken / trawhten vnd ließen sich trawen / so lang biß ihnen daß feuer vnd wasser vber dem Kopff ginge) ein ende machen werde. Man hebe die Augen nur ein wenig auff / so wirdt man sehen / was für eine schwarze vnd finstere Wolcken / vber vns Teutschen schwebet : Seynt dan unsere Nasen von dem Sauff Catarrhen verstopffet / daß sie einen solchen bittern Rauch / der vom brandt vnseres Nachbawren Hauses hergeheth / nicht riechen? Solte man nicht glauben / daß ein feuer / wan öhl hinein gossen wirdt / nicht grösser werden solte? Der es nicht glaubt / wirdt es fühlen müssen. Wohl deme welcher bey zeiten glaubt / vnd von

Sodoma